



**UZBEKISTAN
CUP**

O'zbekiston Professional futbol ligasi
**O'ZBEKISTON KUBOGI VA SUPERKUBOGI
REGLAMENTI
2026**

Mazkur reglament Assotsiatsiya bilan kelishilgan holda tasdiqlangan. U O'zbekistonda professional va yarim professional futbol klublari o'rtasidagi 2026-yilgi musobaqalarni o'tkazishning shartlari va nizomlarini belgilovchi me'yoriy hujjat hisoblanadi.

Reglament FIFA va OFK nizomlari hamda amaldagi normativ-huquqiy hujjatlarga muvofiq ishlab chiqilgan.



UZBEKISTAN
PROFESSIONAL FOOTBALL
LEAGUE

Mundarija

1-bob	Umumiy qoidalar	4
2-bob	Musobaqani o'tkazishdan ko'zlangan maqsad va vazifalar	4
3-bob	Musobaqani boshqarish tartibi	4
4-bob	Musobaqa o'tkaziladigan joy	5
5-bob	O'zbekiston kubogi musobaqasining formati	5
6-bob	O'zbekiston Superkubogi musobaqasining formati	7
7-bob	O'zbekiston kubogi va Superkubogi sovrindorlarini taqdirlash tartibi	7
8-bob	Musobaqa ishtirokchilarining faoliyatini tartibga solish	7
9-bob	Musobaqa hujjatlari va ularni rasmiylashtirish tartibi	8
10-bob	Uchrashuvni o'tkazish tartibi	8



UZBEKISTAN
PROFESSIONAL FOOTBALL
LEAGUE

1-bob**Umumiy qoidalar**

1.1. Mazkur Reglament O'zbekiston kubogi, Superkubogi hamda Superligaga yakuniy yo'llanma beruvchi o'tish Musobaqasini o'tkazish tartibini belgilaydi.

1.2. Liga Musobaqa uchun Hakam va Nazoratchini Markaz bilan imzolangan shartnoma asosida jalb qiladi.

1.3. Mazkur Reglamentda nazarda tutilmagan barcha holatlar yoki istisnolar "Superliga reglamenti" bilan tartibga solinadi.

1.4. Mazkur Reglament ikki — o'zbek va ingliz tillarida chop etilgan. Ikki til o'rtasida ehtimoliy tafovut vujudga kelsa, u holda o'zbek tilida yozilgan qismi ustuvor hisoblanadi.

2-bob**Musobaqani o'tkazishdan ko'zlangan maqsad va vazifalar****2.1. Musobaqa:**

- Mahalliy klublarga Professional klublar bilan bellashish imkoniyatini berish;
- Klublarga liga formatidan farq qiluvchi qo'shimcha musobaqa tashkil etib berish;
- O'zbekistonning amaldagi chempioni hamda kubogi sohibi o'rtasida Superkubok uchrashuvi o'tkazish orqali muxlislarga tomoshabop Musobaqa tashkil etib berish kabi maqsadlarni ifoda etadi.

2.2. Musobaqani o'tkazishda:

- O'zbekiston milliy hamda olimpiya terma jamoalarining xalqaro miqyosdagi rasmiy uchrashuvlarini inobatga olgan holda reglament doirasidagi Musobaqani FIFA hamda OFK nizomlari asosida tashkil qilish;
- O'zbekiston Klublarining xalqaro musobaqalardagi ishtirokiga ko'maklashish maqsadida taqvim rejalarini ishlab chiqish va bunda FIFA hamda OFK tomonidan o'tkaziladigan xalqaro musobaqalarni, O'zbekistonda keng nishonlanadigan bayram tadbirlari hamda boshqa fors-major holatlarni inobatga olish;
- OFK tomonidan o'tkaziladigan rasmiy musobaqalarda ishtirok etadigan Klubni, shuningdek, Superliga va Proliganing kelasi mavsumdagi so'nggi ishtirokchisini aniqlash tizimini yaratish Liga vazifalariga kiradi.

3-bob**Musobaqani boshqarish tartibi**

3.1. Musobaqani tashkil etish, o'tkazishni va boshqarishni nazorat qilish Liga tomonidan amalga oshiriladi.

3.2. Liga tomonidan "Superliga reglamenti", "Proliga reglamenti", "Birinchi liga reglamenti" asosida tashkil etiladigan Musobaqalar ishtirokchilari, shuningdek, Liga tomonidan Musobaqaga taklif etilgan boshqa jamoalar O'zbekiston kubogida ishtirok etish huquqiga ega.

3.3. Klub O'zbekiston kubogida FJ bilan ishtirok etishga haqli emas.

3.4. Musobaqa ushbu Reglament, shuningdek, FIFA, OFK, Assotsiatsiya, Liga tomonidan tasdiqlangan va reglamentga kiritilgan qo'shimchalar, maxsus nizomlar, ilovalar asosida o'tkaziladi.

4-bob

Musobaqa o'tkaziladigan joy

4.1. Musobaqa qatnashchisi Liga tomonidan ruxsat etilgan stadionda Uchrashuv o'tkazadi. Bunda, Superliga, Proliga hamda Birinchi liga Klubi mavsum uchun Liga bilan kelishilgan stadionda kubokning guruh bosqichi uchrashuvlarini qabul qiladi.

Musobaqaning pley-off bosqichi Uchrashuvlari o'tkaziladigan joy masalasi "Superliga reglamenti" asosida tartibga solinadi.

4.2. Musobaqa qatnashchisi o'z stadioniga ega bo'lmasa hamda uy Uchrashuvini o'tkazish uchun boshqa tashkilotga qarashli stadion bilan shartnoma tuzish majburiyati yuzaga kelsa, Klub shu stadiondan foydalanish bo'yicha deklaratsiyani Ligaga taqdim etishi talab etiladi.

4.3. Fors-major holatida Uchrashuvni o'tkazish uchun stadionni o'zgartirishga to'g'ri kelsa, mezbon Klubga Ligada deklaratsiyasi mavjud bo'lgan stadionlardan biri bilan shartnoma imzolash va shu asosda yangi deklaratsiyani Ligaga taqdim etish shartida Uchrashuvni o'tkazish uchun ruxsat beriladi.

4.4. Uchrashuvdan bir kun avval mezbon klub Ligaga stadionning o'yinga tayyorligi to'g'risida dalolatnoma taqdim etishi lozim. Komissar mazkur dalolatnomasiz uchrashuvni o'tkazmaslikka haqli.

4.5. Guruh bosqichida ikki jamoaning o'zaro kelishib, Uchrashuvni raqib maydoniga ko'chirishiga yo'l qo'yilmaydi. Stadionni tayyor bo'lmagan jamoaga Reglament bandidan kelib chiqib, texnik mag'lubiyat yoziladi.

5-bob

O'zbekiston kubogi musobaqasining formati

5.1. O'zbekiston kubogi uch bosqichda tashkil etiladi va shu yo'l bilan final ishtirokchilari aniqlab olinadi:

- saralash bosqichi;
- guruh bosqichi;
- pley-off bosqichi.

Saralash bosqichida:

- jamoalar sonidan kelib chiqib, bir yoki undan ortiq bosqichda Uchrashuv tashkil etiladi;
- jamoalar o'zaro faqatgina bir marta maydonga tushadi va mag'lub jamoa Musobaqa bilan xayrlashadi;
- barcha jamoa bir shaharga tashrif buyuradi va Uchrashuvlar markazlashgan holda o'tkaziladi;

- teng huquqli qur'a orqali juftliklar aniqlab olinadi va bunda Liga jamoalarni bosqichlarga ajratishda ularning o'tgan mavsumdagi holatini inobatga oladi;
- Liga Musobaqaning umumiy qatnashchilari sonidan kelib chiqib, saralash bosqichini bekor qilish huquqiga ega.

Guruh bosqichida:

- 32 ta jamoa ishtirok etadi va ular 8 ta guruhga qur'a yordamida ajratib olinadi;
- Superliganing 2025-yilgi mavsumida dastlabki sakkiz o'rinni egallagan Klublar qur'a oldidan birinchi savatchaga joylashtiriladi va ular guruh bosqichida o'zaro to'qnash kelmaydi. Mos ravishda, 2025-yilgi mavsum Superligada 9-15-o'rin egalari hamda Proliga-2025 g'olibi ikkinchi savatchani, qolgan jamoalar 2025-yilgi mavsumdagi natijasiga binoan kelgusi savatlarga bo'lib chiqiladi;
- barcha jamoa o'zaro bir martadan to'qnash keladi. Bunda, birinchi savatdagi Klub guruh bosqichining ikkita uchrashuvini o'z uyida qabul qilishini ta'minlanadi. Guruhning qolgan ishtirokchilarining Uchrashuvlari tartibiga qur'a yordamida oydinlik kiritiladi;
- dastlabki ikki o'rindan joy olgan jamoa 1/8 final yo'llanmasini qo'lga kiritadi;
- birinchi bo'lgan jamoa 1/8 finalni o'z maydonida, ikkinchi bo'lgan jamoa 1/8 finalni safarda o'tkazadi.

Pley-off:

- 1/8 final, 1/4 final, 1/2 final Uchrashuvlaridan iborat bo'ladi;
- har bosqichida jamoalar o'zaro faqatgina bir marta maydonga tushadi va mag'lub jamoa Musobaqa bilan xayrlashadi;
- har bosqichiga alohida qur'a tashlanadi;
- 1/8 finalida bir guruhdan joy olgan ikki jamoaning to'qnashmasligi ta'minlanadi;
- 1/4 finali uchun alohida qur'a tashlanadi va bunda, barcha jamoalar teng huquqli hisoblanadi;
- 1/2 finali hamda final Uchrashuvlari markazlashtirilgan holda bitta shaharda tashkil etiladi va uning juftliklari ham qur'a yordamida aniqlanadi;
- 1/4 finalda g'olib chiqqan ikki jamoa orasidan o'tgan mavsum Superliga yoki Proligadagi ishtiroki nisbatan yaxshiroq bo'lgani avtomatik ravishda yarim final Uchrashuvining nominal mezboniga aylanadi. Mos ravishda, final uchrashuvi ishtirokchilari orasida 2025-yilgi mavsumni yuqoriroq o'rinda yakunlagan jamoa nominal mezbon hisoblanadi.

5.2. Superliga hamda Proliga Klubi to'g'ridan to'g'ri guruh bosqichida ishtirok etadi (FJ bundan mustasno).

5.3. Birinchi liga jamoasi o'tgan mavsum yakuniga ko'ra birinchilikda erishgan natijasidan kelib chiqib, guruh bosqichiga to'g'ridan to'g'ri yoki saralash o'yinlari orqali yo'l oladi. Mazkur masala Musobaqa ishtirokchilari sonidan kelib chiqib, qur'a oldidan Liga tomonidan hal qilinadi.

5.4. Musobaqaning barcha Uchrashuvlari faqatgina bir marta o'tkaziladi. Ularning har biri 45 daqiqadan ikki taymdan iborat bo'ladi.

5.5. Saralash bosqichida g'olib jamoani dastlabki 90 daqiqa ichida aniqlashning imkoni bo'lmasa, qo'shimcha taymlarsiz navbat penaltilar seriyasiga beriladi.

5.6. Guruh bosqichi yakuniga ko'ra turnir jadvali "Superliga reglamenti"ning 7-bobi bilan tartibga solinadi.

5.7. Pley-off bosqichi va final Uchrashuvida g'olib jamoani dastlabki 90 daqiqa ichida aniqlashning imkoni bo'lmasa, har biri 15 daqiqadan iborat ikki qo'shimcha taym belgilanadi. Shunda ham g'olib aniqlanmasa, navbat penaltilar seriyasiga beriladi.

5.8. O'zbekiston kubogining markazlashtirilgan tartibda o'tkaziluvchi 1/2 final va final Uchrashuvlariga mezbonlik qiluvchi shahar va stadionlar nomi Liga tomonidan aniqlanadi.

6-bob

O'zbekiston Superkubogi Musobaqasining formati

6.1. Superliga va O'zbekiston kubogining amaldagi g'oliblari ishtirokida mavsum oldidan (istisno holatlarda mavsum startidan keyin) Superkubok o'yini bo'lib o'tadi.

6.2. Kubok va chempionlik bir Klubga nasib qilgan bo'lsa, shu bobning 1-bandiga istisno tariqasida Superkubok o'yinida Superliganing amaldagi chempioni va vitse-chempioni o'zaro maydonga tushadi.

Superliga g'olibi Superkubokning nominal mezboni hisoblanadi.

6.3. Superkubok o'yinida g'olib jamoani dastlabki 90 daqiqa ichida aniqlashning imkoni bo'lmasa, qo'shimcha taymlarsiz navbat penaltilar seriyasiga beriladi.

6.4. Superkubok o'yiniga mezbonlik qiluvchi stadion Liga tomonidan belgilab olinadi.

7-bob

O'zbekiston kubogi va Superkubogi sovrindorlarini taqdirlash tartibi

7.1. O'zbekiston kubogida g'olib chiqqan Klubga musobaqaning maxsus kubogi hamda 50 dona maxsus medal taqdim etiladi.

7.2. O'zbekiston Superkubogida g'olib chiqqan Klubga Superkubok uchun ishlangan maxsus kubok taqdim etiladi.

7.3. Taqdirlash atributikalari Liga hisobidan tayyorlanadi.

8-bob

Musobaqa ishtirokchilarining faoliyatini tartibga solish

8.1. O'zbekiston kubogi doirasidagi Uchrashuvga sababsiz kelmagan Klubga texnik mag'lubiyat yoziladi hamda Klub Musobaqadan chetlashtiriladi. Shuningdek, mazkur Klub Musobaqaning kelgusi mavsumida ishtirok etish huquqidan mahrum etiladi.

8.2. O'zbekiston kubogi g'olibi OFK litsenziyani qo'lga kirita olmasa, mazkur Musobaqaning final Uchrashuvida ishtirok etgan jamoa xalqaro maydon uchun yo'llanmani qo'lga kiritadi. Agar final ishtirokchisi ham OFK litsenziyasiga ega chiqa olmasa, u holda xalqaro maydon ishtirokchisi Superliganing mos ravishdagi litsenziyani qo'lga kirita olgan keyingi jamoasi bo'ladi.

9-bob

Musobaqa hujjatlari va ularni rasmiylashtirish tartibi

9.1. Superliga, Proliga va Birinchi liga Klubi o'z Musobaqasi Reglamenti talablarini bajarish shartida O'zbekiston kubogi musobaqasida ishtirok etadi. Musobaqada ishtirok etadigan boshqa har qanday jamoa Liga bilan tegishli shartnoma imzolashi talab etiladi.

10-bob

Uchrashuvni o'tkazish tartibi

10.1. O'zbekiston kubogining saralash va guruh bosqichlarida, shuningdek, O'zbekiston Superkubogi o'yinida futbol klubiga uch urinishda 5 ta (bunda tanaffus vaqtidagi o'zgarish urinish sifatida qayd etilmaydi) o'zgarishni amalga oshirish uchun ruxsat etiladi.

10.2. O'zbekiston kubogining pley-off o'yinlari hamda final Uchrashuvining asosiy vaqtidagi o'zgarishlar mazkur bobning 1-bandi bilan tartibga solinadi. Shuningdek, qo'shimcha ikki taym uchun futbol klubi yana bir o'zgarishni amalga oshirish huquqiga ega. Bunda, har qanday holatda ham Klubning butun Uchrashuv davomidagi futbolchini almashtirishga bo'lgan urinishlari soni 3 tadan oshmasligi lozim. Qo'shimcha taymlargacha bo'lgan hamda qo'shimcha taymlar o'rtasidagi tanaffus vaqtida amalga oshirilgan o'zgarish urinish sifatida qayd etilmaydi.

UZBEKISTAN
PROFESSIONAL FOOTBALL
LEAGUE



UZBEKISTAN
PROFESSIONAL FOOTBALL
LEAGUE

2026